

# L Comun General desche na agorà

Dellai, ruà a Poza per l'aproazion de la linies programatiches, à aprijii i conzec de condivijon e anteveder uzé fora dal president Bernard e da la procuradora Donei per ge dèr n bon endrez a la istituzion



Ence l president Dellai a tout pèrt al Consei del Comun General, che se à avert a la jent desche na agorà.

**Politica** - Ence l president de la jonta provinziàla Lorenzo Dellai a tout pèrt en mèrcol ai 24 de november al Consei General. Na sentèda spezièla, chiamèda ite per l'aproazion de la linies programatiches che cogn vidèr l'urior de la neva istituzion tel curt e tel lonch termen.

"L Comun General de Fascia l'è l frut prezios del lurier de n muie de jent, e ence de la Provinzia e de so president - à dit dantfora Cesare Bernard tel rengrazièr Dellai, domanan che l seghite a ge stèr apede a chesta istituzion. - L lurier no fenesc chiò, anzi l scomenza, e ades l'è debesegn de la idees, de l'empegn, de la gaissa e de l'anteveder de duc, tant chiò che a Trent, per poder jir inant delvers e ge dèr n bon endrez".

Dai prumes vèrsc somea che idees, impegn, gaissa e anteveder n sie jà stat metù belebon tel l'envier via ches percorsi delicat de projetazion del Comun general de Fascia, e ches tant è stat uzà fora ence dal conseier Luigi Chiocchetti te so intervent de salut.

"Nesc amministratori è dò a gestir no fasa de mudament emportanta e delicata, na revoluzione de dut l sistem amministratif, e a fondament de ches prozess - à dit Bernard - cogn esser soraldut la condivijon."

La scontrèda del Consei General à jà metù dant a na vida chièra chesta impostazion: la procuradora Cristina Donei à tout la parola dal zenter de la sala, olache apede ai conseieres l'era ence n bon publich, e l'è dit che l comun cognarà esser desche na agorà, n "gremen de idees" olache duc posse tor pèrt e dir la sia, tel segn de la maior partezpazion, con i obietives de

stravardèr l benstèr de la comunanza e de smaorèr la coejon anter istituzions e jent.

Un a l'outa i ombolc de procura à dapò portà dant la linies programatiches a lonch e curt temp ti setores de competenza, linies che è vegnudes aproèdes dal Consei.

L president Dellai se à dit a una con la linies programatiches e l'è palesà sodesfazion e aprijiamet per la empostazion del Consei del Comun General de Fascia, che à metù a so fondament i conzec de agorà, condivijon e anteveder, conzec che fossa de gran besegn, e massa de spes i mencia anchecondi te la politica, che se à desmentia che la reisc de so inom à apontin l significat de zitadinanza e partezpazion.

Te ches percorsi delicat de projetazion del Comun General de Fascia, nesc amministratori è dò a gestir na vera revoluzione de dut l sistem amministratif. Per meter a jir a nivel concret la neva istituzion l'è stat metù sù desvaliva comiscions, che à jà fissà obietives e programes: una che se cruzia de l'aparit istituzionèl e di regolamenc pervedui; una urbanistica che vel ruèr a aer n regolament edilizie comun, una su la viabilità per tor dant la mobilità interna e se coordinèr con l'autra valèdes ence sul problem di jouves dolomitics.

L lurier portà inant te chesta prima fasa da la comiscions è stat sintetisà da la procuradora Cristina Donei, da so vize Mariano Cloch e da l president del Consei General Cesare Bernard tel cors de na conferenza stampa che à prejentà en curt la linies programatiches.

I obietives concret tel curt temp

l'è fèr partir l'ultim apalt per l Navalge, chel per la mobilia, che cogn esser fat con bando a nivel european; ge dèr na neva senta a l'Anffas te la veia caserma sora la Cèsa de Pausa a Sèn Jan; fèr n projet per la Ciasa de la Moniarina a Sèn Jan; lurèr per portèr a compiment la strèda per la rodes, dant da Poza a Mazin e dapò fin tinsom la val; meter ensema na tarifa per i refudames valiva per duta la val; portèr dant la costion de la circonvallazions, amò de competenza provinziàla, prum de dut ta Cianacei; portèr dant n projet de svilup per l'area de Fedaa en cordanza con la comiscion del Comun de Cianacei, per aer maor forza a Trent.

Apede a dut ches vegnarà tout dant ence la costion del personal. Un di prumes obietives l'è chel de fèr n soul ofize per i servijes linguistics e culturai tel Comun General e no ti singoi Comuns che jà i l'aea. A man a man che al Comun general ge ruarà neva competenzen se cognarà pissèr ence al personal per i etres setores. Per l moment la soula soluzion sarà chela de jir adimprest de personal specialisà dai Comuns o da la Provinzia. Semper con l'obietif de sparagnèr, ajache l problem maor che ence l Comun General se à troà tedant l'è stat la Lege Tremonti e i taes a la finanza locale.

"Cognaron fèr na reforma a cost zero", à dit enstadi la Procuradora, che ensin dal prum moment da sia litazion à pissà de tor ite duc i sogec prejenc sul teritorie. Demò duc ensema se pel jir inant con forza e passèr fora chisc momenc zaches e emportanc per l davegnir de noscia valèda. (vr/lg)

# La grascia, energia alternativa

Esperc de energies alternatives envié te Fascia da la sociazion Transdolomites à rejonà de metan, distributores polifunzionèl e de co desfrutèr miec grascia e piscigna



I reladores Giampaolo Arnoldi, Antonio Fuganti e Silvia Silvestri con Massimo Girardi de Transdolomites a man cencia.

**Energies alternatives** - Te sala de consei de comun de Poza enstadi, per endrez de la sociazion Transdolomites, l'è stat metù a jir na scontrèda dedichèda al metan e ai combustiboi organics e che se pel renovèr.

I carburanc che vegn ca da fontènes renovàboles l'è na oportunità per l teritorie e per Fascia fossa emportant, ence dal pont de veduda turistic, aer n distributor de carburant polifunzionèl, che sporje tant i carburanc tradizionèl che l metan. L fossa na alternativa ence per i mesi publics e i podessa funzionèr ence i giac batiportoes, na oportunità de valuta per recalificèr l teritorie, en particulèr se l'è fondà sul turism - l'è stat dit.

Per l 2020 l'è pervedù n smaorament del 15% del trafich de veicoi, aldò di dac portè dant da l'espert del Zenter Enrescides Fiat Antonio Fuganti, ches crea ricchezza ma ence na lingia de problemes, desche maor trafich e entesameant ambientèl. L setor di trasporc l'è l soul che no à vedù n smendrament de la emiscions de CO2: con la दौरa del metan se podessa ruèr al 23% demanco - à dit Fuganti - amò l'è amò massa pec distributores.

Tel Trentin l'è dò che se svilupea na azion de sistem che tol ite desvalives atores che cogn lurèr ensema, enrescida, amministrazion publica, firmes: l projet "Oil free zone", n raion ledech e indipendent da la दौरa de elesc combustiboi, realisà te n teritorie a vocazion turistica desche chel del Primier e Vanoi e condividù dai Ombolc di 8 comuns del Primier, l'è n ejempie de ches vers. L projet pervet la sostituzion a man a man del petrelech e si derivac con energies da fontènes renovàboles, travers la realisazion de impianc a contegnù tecnologich aut, con la colaborazion de istituc de enrescida e Università.

Giampaolo Arnoldi de la Alpengas de Busan à rejonà del projet Multienergy. Ches impiant, logà a Busan sud, desmostra co meter apede, te la medema area de servije, i carburanc tradizionèl con l gas naturèl e etres carburanc alternatives a emiscions mendres tel segn de la sostenibilità ambientèla, sporjan tel medemo temp etres servijes, desche bar, restaurant, internet point, na boteiga

(shop) e na zona espositiva con fora tecnologies neves tel setor energetich.

## La puza doventa energia con la "digestion anaerobica"

N auter aspet n muie interessant leà a la energies alternatives l'è la oportunità sporta da la gestion sostenibola de grascia e piscigna, l'è ches l'argoment metù al luster da Silvia Silvestri, de la Fondazione Mach de l'Istitut Agrarie de Sèn Micel. L'endrez de anchecondi prejentà desvalives problemes: depòit senester, puza, pendenza di terens, normative che limitea semper de più. La soluzion podessa vegnir ca dal prozess de la digestion anaerobica, la degradazion de la sostanza organica da man de microorganismes en ambient anaerobich, senza ossigen. Se trata de n prozess alternativ al compostaje, che alincontra à debesegn de l'ossigen. Prodor de la digestion anaerobica l'è l biogas e l digestato. L prum pel vegnir durà per produjer energia eletrica consicdrèda verda o per la cogenerazion, che desfruta ence la produzion de calor, estra che de l'energia eletrica, per l telesciudament. L secont l'è n material organich n muie frutuos perche rich de azot te la forma minerèla, che pel vegnir durà desche concim con gran ütöl ma, de gra al prozess digestif, l'è più stàbol e igienich e l'è ite cantitèdes mendres de sostanzas da tessech. L'è luech, donca l passa ite te teren a na vida più sorida molan fora manco amoniaca, con la conseguenza de n smendrament sensibol de la emiscions de gas serra. Per l sparagnèr l'è debesegn de n sistem distributif che resta n muie vejìn al teren e donca l mocigna demanco. Amò apede duran ches prodot se pel lascèr sù de durèr i concimes chimics ajache se pel smaorèr l numer de la distribuzioni tel cors de l'an.

Tel Sudtirol l'è n muie de firmes agricole che se emprevèl de chesta tecnologia, per chel che reverda l Trentin ge volessa che la grascia vegne classificada desche sotprodut enzeve che desche refudam scempie, a na vida da mudèr la normativa per la aziendes che la trata. (cri.m)

